

**PEMBERITAHUAN PERTANYAAN BUKAN LISAN DEWAN RAKYAT**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN**

**: BUKAN LISAN**

**DARIPADA**

**: DATUK HALIMAH BINTI MOHAMED SADIQUE  
[ KOTA TINGGI ]**

**SOALAN NO. 157**

**Datuk Halimah binti Mohamed Sadique [ Kota Tinggi ]** minta **MENTERI PEMBANGUNAN WANITA, KELUARGA DAN MASYARAKAT** menyatakan bilakah kajian berkaitan model penjagaan warga emas akan siap sepenuhnya dan apakah aspek tambah baik yang diberi perhatian khusus oleh Kementerian dalam model baharu ini.

**JAWAPAN**

Tuan Yang di-Pertua,

Kementerian sedang melaksanakan proses awal untuk menjalankan Kajian Diagnostik bagi Membentuk Model Penjagaan Warga Emas Jangka Masa Panjang yang Bersepadu dan Mampan di Malaysia. Kajian ini dijangka akan siap sepenuhnya pada bulan Ogos 2020.

Antara objektif kajian ini adalah untuk melaksanakan analisis jurang bagi membangunkan maklumat asas (*knowledge based*) untuk merangka dasar, perundangan, program dan sistem *Long-Term Care* (LTC) di Malaysia; mengenal pasti permintaan dan keperluan warga emas terhadap LTC; serta menganalisis kemudahan dan perkhidmatan LTC sedia ada dan membuat unjuran keperluan penjagaan menjelang tahun 2030 di peringkat hospital, institusi, komuniti dan rumah.

Beberapa hasil yang dijangkakan daripada kajian ini adalah model pembiayaan yang mampan untuk LTC; model penjagaan warga emas jangka masa panjang yang bersepadu serta pelan tindakan pelaksanaan LTC termasuk untuk meningkatkan kapasiti modal insan bagi menyokong pelaksanaan model ini.

Malaysia tidak mempunyai satu model penjagaan warga emas jangka panjang yang standard buat masa ini, yang mana penjaga atau *care givers* di rumah atau pusat jagaan warga emas tidak tertakluk di bawah mana-mana akta atau peraturan. Kementerian melalui dapatan kajian ini akan melihat kepada isu perundangan sedia ada dalam memastikan penjaga-penjaga ini mempunyai akauntabiliti di bawah peruntukan sesuatu akta atau peraturan. Bagi memastikan kebolehlaksanaan model penjagaan ini pula, salah satu hasil utama kajian adalah cadangan lokaliti atau daerah untuk dilaksanakan model ini sebagai projek rintis.

Dalam masa yang sama, Kementerian Kesihatan Malaysia (KKM) akan mengambil alih pemantauan dan penguatkuasaan ke atas pusat jagaan warga emas swasta melalui Akta Kemudahan dan Perkhidmatan Jagaan Kesihatan Warga Emas Swasta 2018 atau PAHFAS. Akta ini bertujuan untuk meningkatkan mutu perkhidmatan dan penjagaan warga emas yang

## **SOALAN NO. 157**

disediakan oleh pihak swasta dan pertubuhan bukan kerajaan. Kementerian ini dan KKM sedang bekerjasama dengan rapat dalam proses penyediaan draf peraturan bagi melaksanakan akta ini. Sehubungan itu, dapatan kajian LTC ini kelak diharap akan dapat memperkuuhkan pelaksanaan dan penguatkuasaan PAHFAS dalam usaha untuk memberikan perkhidmatan penjagaan terbaik buat warga emas di negara ini.